



Tak wajar layan tetamu ikut kasta

Rumah terbuka eratkan silaturahmi patut dirai jika terima undangan



➔
NIK SALIDA SUHAILA

Pensyarah Kanan
Fakulti Syariah dan
Undang-Undang
Universiti Sains
Islam Malaysia

Rumah terbuka bukan saja diadakan untuk menjemput tetamu bertandang menikmati juadah hari raya, tetapi juga bagi memanjangkan silaturahmi sesama kerabat dan saha-

bat. Menjemput mereka ke rumah atau majlis diadakan tidak bermakna kita tidak akan meraikan mereka pada hari lain.

Ironinya, hari ini rumah terbuka sudah menjadi satu kemestian, tambahan pula kepada mereka yang tinggal di bandar dan pulang beraya di kampung. Justeru, mereka tiada di rumah pada minggu pertama hari raya dan akan menjemput tetamu bertandang pada masa lain.

Mengadakan rumah terbuka amalan yang sinonim dengan Syawal. Ia amat bererti demi silaturahmi dan hubungan baik sesama manusia, bertanya khabar dan mengambil berat antara satu sama lain.

Amalan berziarah ke rumah saudara dan sahabat handai sebahagian dari-

pada usaha mengeratkan tali persaudaraan dan persahabatan sedia terjalin. Namun, ada yang masih segan silu untuk mengunjungi rumah sahabat handai, melainkan dijemput sewaktu rumah terbuka.

Jemput tetamu ke majlis sunnah Rasulullah

Amalan menjemput tetamu ke majlis yang diadakan adalah sunnah Rasulullah SAW, begitu juga memenuhi undangan. Malah, sahabat digalakkan mengadakan kenduri dengan menjemput saudara mara, jiran tetangga dan sahabat taulan untuk menyambung silaturahmi.

Nabi Muhammad SAW bersabda: "Barang siapa yang beriman kepada Allah dan hari akhirat, maka sambunglah hubungan silaturahmi." (Riwayat Imam al-Bukhari)

Adakalanya lebih lima jemputan kenduri yang harus dihadiri dalam sehari. Melainkan ada halangan besar, undangan sudah tentu tidak akan dihampakan walaupun penat tidak terkata. Makan dan minum hanyalah sampingan, sebaliknya yang paling bermakna ialah menggembirakan tuan rumah dengan kehadiran tetamu memelihara majlis mereka.

Hari ini, ada rumah terbuka yang diadakan dengan menjemput orang kaya saja. Majlis pula diadakan di hotel mewah yang menghidangkan juadah yang mahal dan eksklusif. Ia sudah tentu tidak menjadi masalah kepada yang berkemampuan.

Tak wajar bezakan tetamu

Namun, Islam menegaskan tidak wajar membezakan antara tetamu yang kaya dengan miskin, sehingga mereka diundang ke majlis berbeza, bahkan diberi layanan berkasta.

Walaupun dengan hidangan enak, Rasulullah SAW bersabda yang bermaksud: "Seburuk-buruk makanan ialah makanan walimah yang dijemput

orang kaya saja dan ditinggalkan orang miskin." (Riwayat Imam al-Bukhari)

Ada juga jemputan yang hanya dilakukan dengan mengirim khidmat pesanan ringkas ataupun mesej pendek melalui laman sosial yang ditujukan secara umum. Orang menerima jemputan pula langsung tidak mengenali pihak yang menjemput.

Sebaliknya perlu memberitahu dalam tempoh tertentu sama ada akan menghadirinya atau tidak. Santunnya tentunya berlainan jika tuan rumah menjemput setiap tetamu secara lebih terhormat, berbahasa dan menjemput orang yang dikenalnya saja.

Tetamu yang menerima undangan pula harus menghadiri majlis diadakan tanpa membezakan sama ada jemputan itu datangnya daripada orang yang kaya ataupun miskin. Dengan memahami tujuan jemputan untuk memanjangkan silaturahmi, tidak sepatutnya tetamu memilih undangan.

Bahkan untuk menyenangkan hati tuan rumah juga, tetamu tidak boleh sesekali menguzurkan diri hanya disebabkan berpuasa kerana menghadiri majlis rumah terbuka bukanlah semata-mata untuk menikmati juadah.

Boleh berbuka jika puasa sunat

Jika berpuasa sunat, kita dibolehkan berbuka dan tetap mendapat pahala andai niat berbuka puasa adalah untuk menggembirakan tuan rumah yang bersusah payah menyediakan hidangan. Sebaiknya merancang untuk tidak berpuasa jika menerima jemputan, melainkan puasa qada yang tidak boleh dilakukan pada hari lain.

Sebaliknya jika rumah terbuka diadakan di tempat yang menyediakan makanan tidak halal atau terdapat kemungkaran yang mengundang maksiat dan kejahatan, tidak menjadi kesalahan kita tidak memenuhi jemputan. Ia adalah lebih baik demi menjaga thiqah sebagai Muslim yang hidup berlandaskan hukum dan syariat.